



官常典第七百二十四卷

忠烈部名臣列傳十九

宋三 鄭驤

按宋史忠義傳驤字潛翁信之玉山人登元符三年進士第知溧陽縣州民田調江浙二十五州丁逋賦不少貸驤患之盡去其籍使者欲繩以法驤曰著令約二稅爲定數今不除則逋愈多民愈貧賦愈不辦使者不能屈時議自建康鑿漕渠導太湖以通大江將破數州民田調江浙二十五州丁夫所費百萬計朝廷遣官視可否驤條析利病力止之通判岢嵐軍改慶陽府姚古奏爲熙河蘭廓路經略司屬官錢蓋自渭易熙奏辟幕下地震秦隴金城六城壞驤爲蓋言六城熙河重地宜趣繕治因自請董兵護築益機灘新堡六百步以控西夏堡成以功遷官賜緋衣銀魚旃廝羅氏舊據青唐置西寧州董氈入朝其弟益麻党征走西夏大觀中羌人假其名歸附童貫奏賜姓名趙懷恭官團練使至是党征自西寧求歸貫懼事露議者希貫旨欲絕之驤謂貫欺君請辨其僞貫怒將厚誣以罪會敗而止擢京兆府等路提舉常平驤按格爲常平總目十卷頒之所部時陝右大稔驤奏乞

以所部本息乘時廣糴得米六十萬斛高宗初以直祕閣知同州兼沿河安撫使時謀巡近甸金陵南陽長安爲駐蹕計驤言南陽金陵偏方非興王地長安四塞天府之國可以駐蹕會帝東幸揚州復請自楚泗汴洛以迄陝華各募精兵首尾相應庶敵勢不得衝決不報金將婁宿犯同州及韓城驤遣兵拒險擊之師失利金人乘勝徑至城下通判以下皆遁去驤曰所謂太守者守死而已翼日城陷驤赴井死贈通議大夫樞密直學士諡威愍詔賜廟愍節驤在熙河嘗撫熙寧迄政和攻取建置之迹爲拓邊錄十卷兵將蕃漢雜事爲別錄八十卷圖畫西蕃西夏回鶻盧甘諸國人物圖書爲河隴人物志十卷序贊普迄溪巴溫董氈世族爲蕃譜系十卷

劉汲

按宋史忠義傳汲字直夫眉州丹陵人紹聖四年進士爲合州司理武信軍推官改宣德郎知開封府鄆陵縣奉行神霄宮不如令以京畿轉運使趙霽奏徙通判隆德府時方士林靈素用事郡人班自改易繫辭爲妖言以應靈素汲攝守下自獄靈素薦自有道命轉運使陳知存按驗掾史懼欲變獄汲責數掾史知存憚之卒以實聞通判河中府辟開封府推官自盛章等尹京果於誅殺率取特

旨以快意汲每白府奏罷之宰相王黼初領應奉司汲對客輒詆之黼聞奏謫監蓬州稅欽宗召赴闕汲奏願得驅馳外服治兵食以衛京師時置京西轉運司於鄧州以汲添差副使建炎元年范致虛師至陝汲貽書勸以一軍自蒲中越河陽焚金人積聚絕河橋一軍自陝路直抵鄭許與諸道連衡敵必解散致虛以書謝汲而行金人再犯京師諸道不知朝廷動息者三月馮延緒傳詔撫諭謂車駕出郊定和議令諸道罷兵汲謂副總管高公純曰詔書未可遽信公純問故汲曰詔下以去年十二月鄧去京七百里今始至州何也安有議和已三月而敵猶未退乎此必金人脅朝廷以款勤王之師爾可速進兵公純難之汲請自行公純不得已俱至南陽不進汲獨馳數十騎赴都城二帝已北行汲素服慟哭尋代公純攝帥事捐金帛饗士爲戰守計詔鄧州備巡幸汲廣城池飾行闕所以待乘輿之具甚備就加直龍圖閣知鄧州兼京西路安撫使汲奏欲復兩河當先河東欲復河東當用陝兵請先從事河東以定西河之根本於是金人復渡河諜知鄧州爲行在所命其將銀朱急攻京西汲遣副總管侯成林守南陽金人奄至殺成林汲集將吏謂曰吾受國恩恨未得死所金人來必死汝有能與吾俱死者乎皆流涕曰惟命民有請涉山作砦以避敵者汲曰是棄城矣然若屬

俱死無益乃下令曰城中有材武願從軍者聽留餘從便得敢死士四百人又令曰凡仕於此其聽送其家寅出午反違者從軍法衆皆感服無一人失期及南陽陷命將戚鼎將兵三千逆戰及命斬儀與趙宗印分西南門拑之汲自以牙兵四百登陴望見宗印從間道遁卽自至鼎軍中磨其衆陣以待敵至皆死鬪敵却俄而儀敗金人攻之益急矢下知雨軍中請汲去汲不許曰使敵知安撫使在此爲國家致死敵大至汲死之事聞贈大中大夫諡忠介

李邈

按宋史忠義傳邈字彥思臨江軍清江人唐宗室宰相適之之後少有才略精悍敏決見事風生以父任爲太廟齋郎初調安州司理監潤州酒務用薦改京官監在京竹木務擢提轄環慶路糧草通濟贍司府以迂蔡京童貫換右列由承議郎換莊宅副使知信安軍遷知霸州爲遼東國賀正副使邈詣至金人夾攻契丹呼邈至私第以語動之使附己邈言契丹人未厭其主貫懼邈有異議卽聞邈奏願書復任邈上書言契丹不可滅苟誤機事願誅臣以謝邊吏都轉運使沈積中搆邈罪五言以刺意邈每一無所得乃以建神霄宮不如詔免官久之監在京染院進都大提舉京西汴河隄

岸盜起浙東改江淮兩浙制置司管當公事改知嚴州代還貫欲以西師入燕邈復語貫曰方臘小醜一呼屠七州四十餘縣竭數路之力而後能平之殆天以此警公也何可遽移之北乎因密教貫陰佐契丹以圖金人貫不能用乃乞致仕貫收復燕山奏邈知涿州改易州皆辭不赴嘆曰國家禍亂自茲始矣金人犯京師詔趣入見邈慨然復起就道既至會姚平仲戰不利京師震動上不以時賜對問禦敵奈何邈言勝負兵家之常勢陛下無過憂第古未有和戰不定而能成功者因言种師道宿將有重名二敵所畏朝廷自主和議而盡以諸道兵畀師道視敵爲進退將在軍中君命有所不受使見可擊而進勝固社稷之福不勝亦足使敵知吾將帥有以國爲任者上稱善而耿南仲方主和議不合乃換右文殿修撰京畿轉運使辭不拜金人猶駐牟駝岡乃以邈爲京城西壁守禦使邈言姚平仲敗績而敵猶不敢留是畏我也不以种師道再戰已失機會尙可尾其行及河半渡擊之猶足爲後戒議復格三上章致仕不允改主管馬軍公事權樞密副都承旨出爲河北西路制置使以措置山西塘灣屯田弓箭手事邈論塘灣不可爲奪制置使下遷提舉保甲仍領措置司又論不已再奪觀察使則金兵將及境矣遂復舊官守真定後二日落階拜青州觀察使仍知府事邈始

視事兵不滿二千錢不滿二百萬自度無以拒敵乃諭民出財共爲死守民恃邈爲固不數日得錢十三萬貫粟十一萬石募民爲勇敢亦數千人而新集之兵皆無鬪志金人至邈乞師於宣撫副使劉鈐且問道走蠟書上聞皆不報城被圍且戰且守相持四旬城破邈巷戰不克將赴井左右持之不得入鈐離不脅邈拜不拜以火燎其鬚眉及兩髀亦不顧乃拘於燕山府金人問曰集民兵擊我謂我爲賊何也邈曰汝負盟所至掠吾金帛子女何諱吾言敵不能屈久之欲以邈知滄州笑而不答且說之曰天下強弱之勢安有常特吾中國適逢其隙耳汝不以此時歸二帝及兩河地歲取重幣如契丹以爲長利強尙可恃乎金人諱其言命邈從其服飾邈憤詆毀甚力金人撻其口猶吮血嚙之翼日自去髮爲浮屠金人大怒遂遇害將死顏色不變南向再拜端坐就戮燕人爲之流涕高宗贈招化軍節度使諡曰忠壯

閻進 朱勣

按宋史忠義傳進隸宣武建炎初遣使通問進從行既至雲中府金人拘留使者散處之進亡去追還留守高慶裔問何爲亡進曰思大宋爾又問郎主待汝有恩汝亡何故進曰錦衣玉食亦不戀也

慶裔義而釋之凡三亡乃見殺臨刑進謂行刑者吾南向受刃南則我皇帝行在也行刑者曳其臂令面北進踴身直起盤旋數四卒南鄉就死進武校尉朱勣亦從之分在粘罕所勣見粘罕數日遽求妻室粘罕喜令擇所擄內人妻之勣取最醜者人莫諭其意不半月亡去追之還粘罕大怒勣含笑死挺下蓋勣求妻者所以固粘罕也

龔楫 蔣子春

按宋史忠義傳楫字濟道兵部侍郎原之孫世以儒學顯楫懦如不勝衣建炎初聞金人陷郡縣輒忿恚不食念有以自見而不可得兀朮據和州以偏師萬人築堡新塘遏絕濡須之路楫率家僮百餘人襲之鄉里從者三千餘人獲千戶二繫累者數百人輜重稱是縱遣所掠州民父母妻子將歸於滁和鎮撫司遇金兵大至乃取道圩上金騎兵據其衝不得前衆多赴水死楫麾其衆曰今日鬪死亦足稱義士自棄溝瀆無益也戰敗爲金人所獲猶挺劍刺其一人罵不絕口金人嚙割之年十二金人初至新塘有蔣子春者教授里中金人見其挾書又人物秀整喜之欲命以官子春怒罵乃殺之

劉晏

按宋史忠義傳晏字平甫嚴州人入遼舉進士爲尙書郎宣和四年帥衆數百來歸授通直郎金人犯京師以晏總遼東兵號赤心隊建炎初從劉正彥擊淮西賊丁進進黨頗衆晏所捷赤心騎才八百乃爲五色旗使騎兵持之循山而出一色盡則以一色易之賊見官軍累日不絕顏色各異遂不戰而降遷朝散郎正彥反晏謂其部曲曰吾豈從逆黨者耶以衆歸韓世忠世忠追正彥及苗傅於浦城以晏騎六百爲疑兵於浦山之陽賊大駭晏以所部力戰正彥旣擒世忠上其功遷一官金人犯建康杜充兵潰世忠退保江陰晏領赤心百五十騎屯青龍羣寇犯常州郡守請晏爲援晏以精銳七千人出奇破之進直龍圖閣保馬跡山以捍寇寇再至晏選舟師迎戰降其衆千五百人郡人爲晏立生祠戚方圍宣城急命晏往援晏至城下未立營壘出不意直擣方帳下方大驚卻走晏欲生致方單騎追之方率其衆迎戰晏不能敵猶手殺數十人爲賊所害事聞贈龍圖閣待制官其子四人於死所立廟曰義烈歲時祀之

按宋史忠義傳唐佐字公弼徽州休寧人元符三年進士建炎初提點京畿刑獄加直祕閣知南京南京陷劉豫因使爲守唐佐與宋汝爲密疏其虛實遣人持蠟書告於朝江淮都督呂頤浩過常州得唐佐從孫憲授保義郎閤門祗候俾持書遺之憲至睢陽事泄豫捕唐佐并其家憲脫歸唐佐見豫責以大義豫怒斬唐佐境上李橫復潁昌言於朝詔贈徽猷閣待制

閻琦

按宋史姚邦基傳邦基知尉氏縣秩滿不復仕屏居村落間授徒自給時宗室南渡不及者尙散居民間豫募人索之承務郎閻琦匿不以聞爲人所告豫杖之死

孫昭遠

按宋史忠義傳昭遠字顯叔其先眉州眉山人元祐間進士調長沙尉辟河東經略司幹當公事歷鳳翔天興縣河北山東撫諭盜賊幹當公事尋擢河北燕山府路轉運使靖康元年召爲水部員外郎金人圍太原宋師多潰欽宗遣折彥質乘傳同昭遠招集會洛陽陷西京留守西道總管王襄從治襄漢授昭遠西道總管道收潰卒至京兆遇永興路安撫范致虛會諸軍入援昭遠督其進且檄

諸道使出師環慶帥王似熙河帥王倚各以師會涇原帥席貢秦鳳帥趙點鄜坊使張深皆後師期
昭遠二十有八疏劾之合諸道兵得十萬命馬祐昌統之昭遠與致虛同出關祐昌與金人戰敗京
師陷遣使至大元帥府建炎元年遷河南尹西京留守西道都總管至洛收集散亡得義兵萬餘人
柵伊陽使民入保其冬金人來攻昭遠遣將姚慶拒戰軍敗慶死昭遠命將官王仔奉啟運諸殿神
御間道走行在金兵益熾昭遠戰不利其下欲擁昭遠南還昭遠罵曰若等平日衣食縣官不以此
時報國南去何爲叛兵怒反擊昭遠遂遇害官屬無免者四年追贈徽猷閣待制

曾孝序

子訐

陸有常 張侃 丁興宗

按宋史忠義傳孝序字逢原泉州晉江人以蔭補將作監主簿監泰州海安鹽倉因家泰州累官至
環慶路經略安撫使過闕與蔡京論講議司事曰天下之財貴於流通取民膏血以聚京師恐非太
平法京銜之時京方行結糴餼糴之法盡括民財充數孝序上疏曰民力殫矣民爲邦本一有逃移
誰與守邦京益怒遣御史宋聖寵劾其私事追逮其家人鍛鍊無所得但言約日出師幾悞軍期削
籍竄嶺表遇赦量移永州京罷相授顯謨閣待制知潭州復以論謠事與吳居厚不合落職知袁州

尋復職再知潭州道州瑤人叛乘高恃險機毒矢下石官軍不得前於兩山間仆巨木橫累以守孝序夜遣驍銳攀援而上以大兵繼進破平之進顯謨閣直學士遷龍圖閣直學士知青州繕修城池訓練士卒儲峙金穀有數年之備金人不敢犯高宗卽位遷徽猷閣學士升延康殿學士召赴行在旣而青州民詣南都借留許之先是臨朐土兵趙晟聚衆爲亂孝序付將官王定兵千人捕之失利而歸孝序責以力戰自贖定乃以言撼敗卒奪門斬關入孝序出據廳事瞋目罵之遂與其子宣教郎訐皆遇害年七十九城無主遂陷知臨淄縣陸有常率民兵拒守死於陣知益都縣張侃千乘縣丞丁興宗亦死之後贈孝序五官爲光祿大夫諡威愍子訐承議郎有常朝散郎錄其家一人贈侃興宗二官官二子

郝仲連

按宋史忠義傳仲連昌元人建炎元年金人犯河中守臣席益遁去仲連時爲貴州防禦使宣撫范致虛遣節制河東軍馬屯河中就權府事金將婁宿以重兵壓城仲連率衆力戰外援不至度不能守先自殺其家人城陷不屈及其子皆遇害後贈中侍大夫明州觀察使

古今圖書集成
程端中

按池州府志端中程伊川先生子南渡徙家貴池當金兵南攻端中知六安軍殫力守禦死於難時池州統制族人程全爲收骸骨歸葬於池子易晟姪暘皆有名於世

程全

按萊州府志全濰人建炎初爲瑞州都監金人寇江西守臣遁走全攝州事有盜祝生者攻州全拒之且戰且前至萬載兵少力罷而敗賊執之不屈刳其腹民哀思之

醉民

按山東通志醉民失姓名劉豫僭立民罵豫曰汝是何人要作官家宋何負汝豫殺之

邢希載

按濟南府志希載歷城人勸豫歸宋殺之

袁植

按無錫縣志植字材老崇寧三年進士第復中詞學兼茂科官監察御史金人入寇陳邊防十三事

以誅佞人爲先不納引疾致仕建炎初召爲左司諫直言忤宰相出守岳州會北騎大入叛臣李九文據鄂州大剽荆湖植條其姦上之允文中路得遞疏怒勒兵趨岳陽執植植正色詆之不少懼遂見害於武昌事聞追贈直龍圖閣錄其後二人

王相如

按宣城縣志相如字次卿知微曾孫孤貧嗜學年四十不娶或問之曰恐負吾學也呂右丞好問守宣州得士四人詹友瑞李宏周紫芝及相如與焉每譙集必與四人者俱建炎初江右盜起相如逃匿山中爲賊所得州有檄招附賊令草檄以報相如奮髯叱曰吾卽死不能爲賊作牒遂遇害一門皆死僧毅達得其遺稿三百七十餘篇號溪堂集周紫芝序稱爲仁者之勇云

詹友瑞

按宣城縣志友瑞字伯尹少力學自奮政和丙申領鄉貢第一建炎初上書謂金讎當復中原可取言甚剴激不報會潰將戚方圍宣州州守李光分城守禦友瑞每匹馬輕裘奮當鋒矢以爲衆倡賊平補迪功郎調監池州贍軍酒庫值盜發鄰鄆郡委友瑞攝西安尉與賊力戰中流矢卒年四十三

古今圖書集成
詔錄其子雷友瑞慷慨報國素所自許周紫芝作哀辭極稱之

於琳

按蕭山縣志琳爲本州防城保甲建炎初琳從浙東安撫討賊戰敗被執賊欲刺面強降之琳罵不屈賊衆攢射矢著如蝟罵不絕口死之越帥翟汝文東藁招魂哭而祭之

歐陽元量

按臨江府志元量字宏中新喻人嘗著決勝兵要書上之建炎初傅雱通問兩宮元量假從事郎爲介不果行授寧鄉令調陽山猺獠叛元量率兵討之屯營去賊十里賊乘夜劫之統制蔡整黃登戰歿元量被執罵賊不屈死

林郁 毛奎 曾仔 沈昇

按宋史林冲之傳冲之子郁字襲休宣和三年進士再調福建茶司幹官建州勤王卒自京師還求卸甲錢郡守逃匿卒鼓譟取庫兵爲亂殺轉運使毛奎轉運判官曾仔主管文字沈昇郁聞變急入論卒遇害事聞詔各與一子官

余光庭

按福建通志光庭羅源人大觀三年擢第累官光祿寺丞出知南陽建炎初南陽陷不屈死舉家殲焉

黃哲

按四川總志哲華陽人崇寧進士永興軍舉主管文字徐師仁薦於朝忤蔡京意除國子學錄遷宗正寺少卿金人陷都城索玉牒哲貯以陶器坎地而藏獲免高宗卽位被旨迎玉牒及幸維揚哲言宜幸金陵爲朝論所阻除國子祭酒後扈駕渡江被追執不屈死

韓浩 朱庭傑 王允功 王薦 周中

弟辛

按宋史忠義傳浩丞相琦孫以奉直大夫守濰州建炎二年金人攻城浩率衆死守城陷力戰死通判朱庭傑身被數箭亦死權北海縣丞王允功司理參軍王薦皆全家陷沒浩特贈三官官其家三人庭傑允功薦各官其家一人朝議大夫周中世居濰州率家人乘城拒守中弟辛家最富盡散其財以享戰士城陷中闔門百口皆死紹興六年以周聿請贈官

古今圖書集成
黃渙

按廣東通志渙字彥舟叔達次子幼力學通經史百家慷慨重氣節元符三年鄉薦崇寧間授定州文學上書論天文政和七年陞通直郎權知梧州軍事宣和五年以選次赴京會寇至渙率在部官奔南薰門外上表留聖駕已而奔南京奉表勸進高宗壯其志擢兵部侍郎建炎三年力戰而歿贈朝奉大夫祕閣修撰官其一子

盧臣忠

按江南通志臣忠黟人政和進士由臨安府司理累遷右正言後扈駕至建康敵使有逼近御舟者臣忠叱退之失足墜水中數日上求臣忠所在使沒得其尸拱立如生帝憫其忠賜水銀以殮贈右諫議大夫

唐重

按宋史忠義傳重字聖任眉州彭山人少有大志大觀三年進士徽宗親策士問以制禮作樂重對曰事親從兄爲仁義禮樂之實陛下以神考爲父哲宗爲兄盍亦推原仁義之實而已何以制作爲